



LINYON

Pibliksayon Linyon Demokratik Seselwa

Vol. 3

No. 1

Le 13 Avril 2018

Akoz Sesel i bezwen nouvo eleksyon

LDS i pare pour travay avek tou kote politik pour fer sa ki bon pour Sesel. Be nou bezwen en gouvènmàn for ki kapab rezoud bann problem ki nou pei i fer fas avek. Nou osi bezwen en direksyon kler pour nou pei progresse.

Ler Prezidan i en kote e Lasanble Nasyonal i lot kote, diferans i bezwen arive. Demann pour lapwèntman trwa nouvo minis i lekzanp ki montre sa. Lefe ki Lasanble pa'n aprouv sa bann lapwèntman i montre ki manyer Prezidan ek Lasanble i war kekosz diferan. Sa pa bon pour pei.

Msyè Faure ek son gouvènmàn pe tourn an ron. LDS pa kapab zis swiv Msyè Faure ler nou kwar i pe al dan move direksyon. Eleksyon i nesese pour donn Seselwa en sans swazir sa direksyon kler.

Msyè Faure in vin Prezidan dapre en mezir dan konstitisyon ki'n ganny rezete. Li-menm li in aksepte ki sa laranzman pas baton pa ti demokratik. Alor, Msyè

Faure i devre met nouvo lareg konstitisyon an pratik e fer nouvo eleksyon.

Pei i bezwen en gouvènmàn kot Prezidan ek Lasanble pe al dan menm direksyon.

Dan son premye lannen, LDS in travay avek Msyè Faure pou akonplir serten kekosz. Sa in konsern sirtou reform bann lenstitisyon ki nesese pour en demokrasi pli solid. Sa bann reform in tous Komisyon Elektoral, SBC, Komisyon kont Koripsyon e plizyer lezot.

Travay ki LDS in fer pou trennen si napa aksyon konkret ki swiv. Bann size parey larzan ki'n ganny vole, later e propriyete ki'n ganny donner malapropo, 50 milyon dolar ki'n disparet – tou sa la i bezwen aksyon pli vit ki posib. Nou bezwen osi bann mezir konkret pou redwir pri komodite, rezoud problem lakaz e ankouraz nou bann lendistri.

Eleksyon ii bezwen vini to ou tar. LDS i dir i'nn ler.

Fodre les lepep Seselwa deside ki Prezidan zot oule



'WALKOUT' DAN LASANBLE PA POU ANMENN NANRYEN

Parti Lapep ti deside kit Lasanble Nasyonal apre ki Leader Lopoziyon ti demande ki nou annan nouvo eleksyon Prezidansyel aköz sa pei pa pe al dan en bon direksyon anba Msyè Danny Faure. Me sa pa pou abouti dan nanryen, LDS i kapab kontinyen par li-menm si nesese. Kestyon ki zot bezwen rezoud se si Msyè Faure pou aksepte fer nouvo eleksyon. Manm Lasanble Parti Lapep i devre ankouraz li pou pran sa desizyon pour met nou pei dan en direksyon kler.

Travay Lasanble i donn rezilta

Dimoun par ler i kritike ki Lasanble i komans en travay me ki i aret dan semen san rezilta konkret. Sa pa vre, e i vin zis aköz en mank konprezon prosedir ki Lasanble i bezwen swiv.

Tou size ki Lasanble in leve in swa anmenn rezilta konkret deza oubyen i pe kontinyen. Napa nanryen ki'n ganny met dekote.

Sa semenn, nou'n war en pa an avan pour formasyon Komisyon pour Laverite e Rekonsilyasyon. Sa i en demars ki pou anmenn leklersisman enportan lo nou listwar. Sa size ti ganny met lo latab par LDS zis apre ki nouvo Lasanble ti komans travay. Me in bezwen espere ki en lalwa i ganny ekri.

STOP PRESS

Nouvo revelasyon dan Lasanble lo sa ki'n arive avek larzan sezi par FIU. ANKOR GRO SOK!

Byento dan Lasanble, pou annan nouvo devlopman lo lezot size. Lanket lo larzan FIU ek NDEA in pas dan en nouvo letap. Bann size later Gouvènmàn ki'n ganny donner pou ganny rann swivan demann ki sa bann propriyete i retourn pour leta. Nouvo lanket pou lanse pou gete ki'n arive avek sa \$50 milyon.

Dan serten domenn, kekosz in fini sanze. Zafer Linyon Estate in ganny met o-klè e en nouvo bord i an plas pou diriz sa lantrepriz dan la transparans. Gouvènmàn in aksepte ki STC pa kapab pey Parti Lapep gro gro sonm pour later ki ti ganny pran ek leta. Serten ansyen Minis pe deza ganny pourswiv pour koripsyon e nou ekspekte war zafer an kour byento. I annan tro bokou lekzanp pour site.

I vre, kekosz i pran en pe letan me sa se aköz nou bezwen swiv prosedir. Lasanble i bezwen travay avek lezot brans gouvènmàn e bann lenstitisyon parey Komisyon Anti-Koripsyon.

Tou travay ki LDS i pran pou anmenn rezilta.

LDS i lans lapel pour zenn voter anrezistre

Bokou zenn ki'n ganny laz vote pankor anrezistre. Fodre rapel ki anrezistrem pa ganny fer otomatikman ler ou ganny 18-an. Tou zenn ki ganny sa laz i bezwen al anrezistre an personn.

Vote i ou drwa e osi ou devwar. I mwayen ki ou annan pour enflians desizyon ki ganny pran ki kapab desid ou lavenir.

Si ou pankor anrezistre, ou devre fer li deswit. En eleksyon i kapab arive nenport ler.

Ou kapab anrezistre kot biro Komisyon Elektoral, Aarti Chambers, Mont Fleuri. I annan osi zofisye lanrezistrem voter dan biro Ladministasyon Distrik dan sa bann landrwa: Beau Vallon, Anse Aux Pins, Anse Royale, Anse Boileau, Baie Ste. Anne e La Digue. Ou kapab al kot sa enn dan ou rezyon. Lanrezistrem i fer 9,00 er ziska 3.00 er, Lendi ziskan Vadredi.

Pa manke. Met ou non lo lalis pour ou kapab vote.

Rezilta travay LDS

Air Sey i rekonsider konpansasyon

Dan deba lo Air Seychelles dan Lasanble Nasyonal, LDS ti sizere ki Air Seychelles I rekonsider konpansasyon pour sa bann travayer ki pe perdi zot plas. I ti propoz 6 mwan lapey olye 3 mwan. Nou kontan ki Air Seychelles inn konsider sa e pou antre an diskisyon avek Gouvernman byento pou fer sir ki sa bann Staff Air Seychelles I ganny pli bon konsiderasyon.

STC pou aret donn Parti Lepep larzan

Tou dimoun in soke pour tande ki STC pe pey Parti Lepep plizyer milyon rroupi pour bann landrwa ki zot ti pe servi. LDS ti demande ki sa bann tranzaksyon ant STC ek Parti Lepep i arête. Minis Finans in donn langzman Gouvernman ki pou arete. Fodre i arete.

Rekonnet viktim koudeta

Zis apre formasyon nouvo Lasanble, LDS ti met lobzektiv pour revwar bann lenzistis koze par koudeta. Rezilta ki'n sorti deza se aksyon pour retir le 5 Zen koman en zournen nasyonal. Sa in osi anmenn Msye Faure pour eksprim regre e demann pardon lafanmir enn bann viktim, polisye Berard Jeannie. Sa i komansman en larout pour rekonnet diton ki koudeta in fer. Komisyon Laverite ek Rekonsilyasyon pour anmenn sa travay pli devan.

Msye St. Ange – Oli lanmour prop?

Apenn ki i'n sorti koman minis, Alain St. Ange i dan tou protestasyon.

Napa group ki fer en pa pou met zot problem devan gouvernman ki i pa sey antre ladan. Me, St. Ange ti dan sa menm gouvernman kot i ti annan portefey pour tourism. I ti annan pouwar pour rod en solisyon pour sa bann problem ki pe sorti prezan.

Tou sa bann kestyon in la depi lontan. I annan serten ki ti menm tonm anba responsabilite St. Ange. OK, ler in sorti dan gouvernman in war keksoz plikler. Be fodre annan en pe lanmour prop osi. Pa anpese ki i donn son sipor, me fer li avek lonekte. Fer enn pti mea kulpa pour aksepte kot ou ti annan tor. A mwen ki St. Ange pe zis sey servi sa bann dimoun pou li ganny en lipye politik pou debout lo la.

MNA Adelaide i siport Lasosyasyon Peser B. Lazare

Lasosyasyon Peser Baie Lazare, en liniativ MNA Adelaide, ti ganny formen an Zilyet 2017. Bi sa Lasosyasyon (portre anba) se pou angaz tou bann peser ek bann zanmi peser pou devlop e promot sa sekter lekonomi e an menm tan pou zwenn e travay ansanm avek bann lotorite konsernen pou kapab ganny bann benefis pour distrik Baie Lazare an zeneral.

Sa Lasosyasyon pou osi ede dan developman bann peser par ledikasyon e partaz lenformasyon. I pou osi promot

lamitye ant bann peser ek la kominote. Tou sa ki travay e ki benefisye avek bann resours lanmer, menm si zot pa reste Baie Lazare, i kapab vinn manm sa Lasosyasyon e partisip dan bann aktivite ki sa Lasosyasyon I ofer. Tou manm sa lasosyasyon I ganny valorize e nou fer sir ki napa enterferans politik ou larelizyon ki pou detri bi sa Lasosyasyon.

Sa ki enterese pour zwenn Lasosyasyon zot ganny demande pou pran kontak avek Chairman Lasosyasyon, Jean Claude Michel, lo numero 2574720.



Lapel pour manm LDS

LDS i envit tou son manm pou renouvle zot afilyasyon. Nou osi envit tou dimoun ki siport LDS pou anrezistre. Kontakte ou reprezantan distrik obyen biro LDS, Lakaz Seselwa, Mont Fleuri. Tel. 4321122

LDS Youth Association Meeting

Pour tou zenn aze 15 an a 35 an, Dimans le 15 Avril aparti 2 er apremidi kot ICCS, lasal No. 2. Vin partisipe e konn nou plan pou lannen 2018.

Lasosyasyon Madanm LDS

i envit ou pour aktivite selebrasyon Lazournen Travayer Dimans le 29 Avril - Piknik lafanmir Mardi le 1er Me - HOP Plis detay dan prosen lanons